

Exposiziun Stampa 3D i'l museum a Strada

Radunanza generala da la Società Stamparia Strada

■ (anr/fa) **D'incuort ha salvà la Società Stamparia Strada sia radunanza generala. La festa da giubileum da trent'ons vain fatta quista stà culla musica dals Fränzlis da Tschlin e'ls oters musicants dal lavuratori.** Daspö trent'ons exista la Società Stamparia Strada. Ella s'ingascha pel mantegniment da la stamparia veglia a Strada respectivamaing dal museum. Quel as rechatta d'immez il cumün da Strada illa Chasa S-charplaz. In quista stamparia sun gnüts stampats tanter ils ons 1689 e 1881 üna blerüra da cudeschs rumantschs. A la radunanza generala ordinaria chi ha gnü lö in sonda e chi'd es gnüda manada dal president *Georg Häfner* ha tut part bundant üna quarantina da persunas. *Theodor Gut*, plü bod il CEO da las Zürichsee Medien ed uossa commember da la fundaziun Stamparia Strada, ha preschantà la nouv'ex-

posiziun «Stampa 3D» i'l museum a Strada.

La plü grond'exposiziun tematica in Svizra

Quist'exposiziun preschainta la tecnologia da stampar in trais dimensiuns. «Pel mumaint es quai la plü grond'exposiziun in Svizra chi'd dedichescha a quist tema», ha dit il president Häfner, ch'els sajan superbis da pudair muosar i'l pitschen museum a Strada ün'exposiziun uschè actuala. «Quai es stat pussibel grazcha a la collavuraziun cul Politecnicum ETH ed üna scoul'ota specialisada a Turich sco eir cun differents exponents da quella branscha.» Uschea pon preschantar ils respunsabels dal Museum Stamparia Strada exponats tuot particulars ed exclusivs in lur museum: Els muosan il prüm vesti chi'd es gnü copchè in trais dimensiuns. Ils architects pon far models cun

quista tecnologia moderna. «Fich interessada vi da quella es eir la Formula 1, no pudain muosar tanter oter ün tanc fich liger chi'd es gnü copchè in 3D», s'allegra Häfner, «cun noss duos stampaders in 3D cha no vain cumprà pudaina stampar d'ürant las uras d'avertüra dal museum cul prüm pitschens ogets in plastic e cul tschel figüras da tschiculatta.»

Festa da giubileum quista stà

Las tractandas statuarias ha evas la radunanza generala da maniera speditiva: Il president ha pudü preschantar als commembers ün surplü d'entradas da bundant 16 000 francs. Il guadagn da la Società Stamparia Strada consista da las entradas dals commembers. Pella gestiun dal museum es respunsabla la fundaziun Stamparia Strada. La radunanza generala ha acceptà il quint annual 2017 e decis unanimamaing da surdar 15 000

francs a la fundaziun per finanziair l'exposiziun actuala «Stampa 3D» e la gestiun dal museum. Sainza cuntravusch han ils preschaints approvà eir il rapport annual. Davo la radunanza ha sunà la musica da Tschlin suot la bachetta da *Duri Janett* chi'd es eir commember da la fundaziun Stamparia Strada. Als 27 da lügl festagescha la società in chasa da scoula a Strada seis giubileum: «Quai es güst l'ultim di dal lavuratori dals Fränzlis da Tschlin, els e'ls participants da lur lavuratori imbelliran nossa festa», ha dit Häfner, «davomezdi es lura avert il museum da la stamparia per tuot quels chi nun han fin quella jada amo vis l'exposiziun da la stampa in trais dimensiuns.»

L'exposiziun düra fin la fin d'october, il museum es avert mincha sonda da las 15.00 a las 17.00, i'ls mais lügl ed avuost eir in gövgia a las medemas uras. Per gruppas driva il museum tenor cunvegna.

Commembers

amatuors da l'art naira

Avant quatter ons vaiva surtut Georg Häfner da seis antecessur *Domenico Scharplatz* il presidi da la Società Stamparia Strada. Da chaschiera fa *Maria Pardeller-Fliri*. Ils ulteriurs commembers in suprastanza sun l'actuar *Nicolo Bass* ed *Armon Kirchen*, il qual rapreschainta il cumün da Valsot. Actualmaing ha la Società Stamparia Strada passa 300 commembers. Els sun amatuors da l'art da stampar chi vain nomada minchatant eir l'art naira. Divers d'els sun da la regiun, oters però eir da l'ulteriura Svizra e dals pajais vaschins. Tanter da quels sun eir divers chi sun o d'eiran activs in stamparias.



Ils preschaints in sala polivalenta a Strada a chaschun da la radunanza generala da la Società Stamparia Strada.



La musica da Tschlin suot la bachetta da Duri Janett ha imbelli la radunanza generala.